

UNITED STATES OF AMERICA



FOUNDED 1836

WASHINGTON, D.C.

DISSERTATIO

PHYSIOLOGICA INAUGURALIS,

DE

Causis Respirationis ejusdemque Effectibus;

QUAM,

SUB MODERAMINE VIRI ADMODUM REVERENDI

JOHANNIS EWING, S.S.T.P.

UNIVERSITATIS PENNSYLVANIENSIS PRÆFECTI;

EX CURATORUM PERILLUSTRIUM AUCTORITATE,

NEC NON

AMPLISSIMÆ FACULTATIS DECRETO,

DEO MAXIMO ANNUENTE,

PRO GRADU DOCTORIS

SUMMISQUE IN MEDICINA HONORIBUS ET PRIVILEGIIS
RITE ET LEGITIME CONSEQUENDIS;

ERUDITORUM EXAMINI SUBJECTAM SUSTINUIT

GEORGIUS BUCHANAN, M.B.

BALTIMORIENSIS

REGIÆ PHYSICÆ SOCIETATIS EDINENSIS

PRÆSES ANNUUS,

ET SOCIUS QUOQUE SOCIETATIS AMERICANÆ

PHYSICÆ EDINENSIS EXTRAORDINARIUS, &c.

AD DIEM 2 FEBRUARII, HORA LOCOQUE SOLITIS.


*Hence men and beasts, the breath of life obtain,
The birds of air, and monsters of the main.*

Dryden

PHILADELPHIÆ:

TYPIS PRICHARD ET HALL.

M.DCC.LXXXIX.



VIRO HONORABILI
THOMÆ M'KEAN,
ARMIGERO LL.D. S. A. P. S.

Judici Reipublicæ Pennsylvaniensis supremo, magno ingenu acumine et vero patriæ amore in primis conspicuo, quibus ei, non minus domi quam militiæ, in summo ejus periculo consuluit; et in officio, quo in præsentia fungitur, ita semet gerenti, ut eum omni observantia et reverentia unusquisque prosequatur:

Item

VIRO DOCTO
GULIELMO SHIPPEN, M.D. S. A. P. S.

Anatomia in Academia Pennsylvaniensi Professori, summas laudes ob vires ingenii insignes, non tantum in arte propria, sed etiam in aliis scientiæ partibus, evidentissime demonstratas, probe merentis humanitatis amico et patrono, quo duce et auspice arti Hippocraticæ per triennium studuit:

Infuper

VIRO VENERABILI
CAROLO FREDERICK WIESENTHAL,

Rei Medicæ apud Baltimore cultori felicissimo, qui, ob magnam omnium, quæ medicinam spectant, notitiam, non minoris ibi, quam Sydenhamius olim apud Britannos fuit æstimatus, penditur; suæ familiæ semper Amico et Medico:

Itidem

PATRICIO ALLISON, D.D.

Apud Baltimore, viro eruditione recondita variaque nobilitato, et ab omnibus amicis, non tantum ob publicas sed etiam privatas virtutes, quæ eum ornant, plurimi facti:

Quinetiam

Amico suo digno plurimumque colendo,

G U L I E L M O L Y O N ,

de Westergle apud Maryland, qui, medicina multos per annos, cum successu prosperrimo et maxima existimatione, facta, ad vitam privatam semet contulit, et hodie degit, multarum familiarum infeliciam amicus certus et singularis, ab omnibus, qui eum norunt, propter urbanitatem, amicitiam et hospitalitatem vix adæquandas mirum in modum dilectus :

Denique

Fratri suo dilecto

ALEXANDRO PITT BUCHANAN,

Qui, in præsentia, studio legum patriæ nationumque operam sedulus diligensque navat, et jam amicis spem ingenii felicioris et futuræ claritudinis facit :

Illis, ob multa et varia beneficia ab iis accepta, ut auxilium amicorum maxime desiderabatur ; huic, ob illum amorem vere fraternum, qui, se inter et eum semper intercessit,

Hanc Dissertationem Physiologicam inauguralem, ut monumentum animi haudquaquam ingrati parvulum, summa observantia D. D. C. q.

AUCTOR.

*Dissertatio Physiologica Inauguralis
de Causa Respirationis ejusdemque
Effectibus.*

Proœmium.

TRIENNIUM, ex quo coram eruditis hujusce
Academiæ professoribus et curatoribus apparuerim, jam
elapsum est, cujus pars maxima in Europa in scientia
medica et philosophica acquirenda fuit consumpta.
Leges Academicæ igitur, ut summos medicinæ honores
ambiam, permittunt. Si quis vero amicorum secum
mirabitur, cur eosdem in aliqua academia Europæa
non petiverim, ei respondeo “*amorem patriæ omni*
“*amore esse vehementiorem,*” et, si lauream Apolline-
am hic potius, quam alibi, adipisci aliquid claritudi-
nis, quod minime timco, mihi derogabit, me nonnihil
famæ et existimationis amittere, quam affectui animis
in primis intenso etiamque laudabili non indulgere,
malle.

Hic primi medicinæ radii menti lumen offundere cæperunt, hic ad primum medicinæ gradum evectus sum, et hic quoque prius laborum Academicorum finem facere, deinde in posterum, uti gratum hujusce academix alumnus decet, quantum in memet est, ad famam ejus sustinendam conferre, decrevi. Si nondum tantum claritatis, quantum Edinburgensis, Oxoniensis et Leidenfis adeptæ sunt, sibi comparavit; tempus, uti spero, non longe abest, quo palmam illis præripiet. Literæ primum apud orientem excoli cæperunt, et occidentem versus progredientes regiones nostrates longe lateque patentes illustrarunt. Igitur minime dubito, quin America, cum ignorantia et barbaries apud incolas Europæ in locum sapientiæ et humanitatis fuerint substitutæ, sedes artium et scientiarum primaria tandem evaserit, et Philadelphia, quæ nunc in studio earum agitando defudat, reliquis ejus partibus, quotquot sunt, præcelluerit.

Imperium Americanum, jam liberum et a nullo alio misere pendens, rem ita sese habituram esse spondet. Namque hic nulla dominatio, illa pestis ingenui at perniciës, viget; sed libertas, contra, omnium
quæ

quæ indulgentia divina in mortales contulerit beneficiorum maxima, floret, quæ animum actuosum nullis limitibus angustis circumscribit, sed quasi fidem dat, viros ingeniosos non paucos brevi orituros esse, qui Newtonio, Verulamio et Boylæo, in philosophia, et Shakespeare, Milto et Pope in poetice excolenda prælucebunt.

Hanc digressionem mihi laude honorum, quos patriam dilectissimam brevi adepturam esse confido, abrepto longiusque justo forsitan evagato lector uti spero, facilis benevolusque remittet. Nunc proximum est, ut ad inceptum veniam; namque, ut aliquam dissertationem super argumento medico vel philosophico prius conscribam, necesse est, quam honorem, quem ambiam, attingere possim. In uno alterove autem rite exequendo non parum laboris subeatur, et multæ difficultates offendantur oportet; cum vero omnia industriæ cedant, nulla materia, ut cunque ardua esse videatur, juvenem ab ea exploranda detertere debet, dummodo spes affulgeat, se aliquid ei luminis esse offusurum. *Investigationem causarum respiratiouis ejusdemque effectuum, ut dissertationis inauguralis*

auguralis argumentum, selegi, nulla quidem id clarius pleniusque illustrandi spe, sed consilio tantum notitiam rei idoneam comparandi, quæ attentionem et philosophorum et physiologorum in semet per aliquot annos proxime elapsos convertit, et magna obscuritate etiamnum involuta manet.

Sub initium opusculi, paulum laboris operæque in explicando, quatenus, iudicio meo, organa voluntati parentia eidemve non subiecta per animum afficiantur et regantur, ponendum, ut principia, quæ receperim, melius intelligantur putavi. Deinde in causas, unde respiratio primum oriatur, eas, quibus sustineatur et per vitæ decursum continnetur, aliquas ejus varietates, et postremo in animalis caloris originem, inquisivi. Hæc omnia in capita diversa ordinis perspicuitatisque causa redegi.

C A P. I.

*De potestate, quam animus in organa voluntatis
parentia eidemque non subiecta habet.*

ANIMUM investigandum fuscipere, quatenus ad externa spectat, vel per artes scientiasque diversas excoli potest, a proposito alienum foret, et limites opusculo huiusmodi præscriptos longe excederet; quoniam nihil aliud omnino nobis in animo est, quam eum solum modo, quantum ad machinam animalem attinet, considerare, et vim, quam in organa corporis humani diversa habet, quæ a physiologis voluntaria et non voluntaria appellantur, monstrare.

In huiusmodi investigatione multa sunt superatu difficilia, a viris illustribus proposita et defensa; qui tamen, licet de iis ingeniose disceptaverint, nihil certum, vel fundamento stabili innitens, reliquerunt. Locus igitur novæ opinioni est, quæ mox proponetur, et per decursum huius dissertationis multæ aliæ, ea vero diffidentia et modestia, quæ juvenem primitias literarias in vulgus edentem decent, in medium proferentur.

Quo machinam humanam, ut exemplum, pro omnibus aliis animatis ponamus, conceptu difficile est, quomodo plurima per organa diversa perficiamus, nisi ab aliquo agente potente, qualis est animus principumve sentiens adjuti. Non desunt tamen, qui audacter affirmant, mortales sine eo agere, et organa vitalia præsertim a vi sibi insita, necum animo vel etiam vi nervosa conjuncta, nec ab iis ulla ex parte
pendente,

pendente, exerceri. Cum vero nobiscum consideramus, systema nervosum unicam animi sensusque sedem esse, et nullum animal a primo ortu usque hisce organis præditum diu sine iis vivere, vel munia vitæ diversa obire posse, hypothesin non expellere non possumus. Insuper affirmare licet, animum assidue, dum corpus quolibet sensum excitare valente afficiatur*, agere, et in hoc principio conjungi, quod sentit, cogitat, reminiscitur et ratiocinatur†.

Quandocunque igitur aliquod stimulus cuilibet corporis parti admovetur, adeo ut systema nervosum afficiatur, partis ejus actio movetur. Hæc potestas, quæ animus præditus est, vim nervosam eo dirigendi præstat, et hinc igitur actio modo posita proficiscitur‡.

Ita in omnibus motibus voluntariis, animus actor præcipuus est, a quo perficiuntur. Si quis hoc inficiaretur, audacia sua ea vitio verti jure posset. Eorum quidem non semper conscii sumus; namque in somno, sed præsertim in somniis, organa voluntaria frequenter exercemus, dum animus quasi somnuculosus non multum inde afficiatur. Exemplum probe novi, ubi juvenis genorofus, qui inter dormiendum ambulare consueverit, e fenestra partis ædium superiore exiliens super portam decidit, et pectus ei tanta violentia impexit, ut sibi mortem propemodum intulerit. Nihilominus ad distantiam non parvam postea ambulavit, antequam experrectus est. In hoc tamen exemplo, non ponere possumus, animum principiumve sentiens ex toto quievisse, et actiones modo positas sine eo fuisse absolutas. Nec in illis casibus res aliter se habere videtur, ubi quidam e lectis surgentes seras aperuerunt dormientes, et alii, dum ludum literarium ad huc frequentabant, lectiones adeo perfecte edidicerunt, ut

proximo

* Reid's Inquiries.

+ Whytt's Essays on vital and involuntary motions.

‡ Cullen's First Lines.

proximo mane omnem ejus lineam repetere valuerint. Fabricam animi universam adeo ignoramus, ut, quam in hisce duabus systematis conditionibus sibi invicem contrariis et oppositis mutationes possit subire, nesciamus. Namque admodum probabile est, homines, inter dormiendum, ejus, quod agunt, conscios esse, sed impressiones in animum factas adeo fugaces esse, ut, somno in vigiliam mutato, extingui et obliterari possint. Hinc e memoria quidem sæpissime excidunt. Quinetiam a celebri Culleno id, quod pro re vera habemus, accepimus, energiam cerebri gradus incitationis, quantum ad diversas animales, vitales et naturales functiones attinet, diversos habere posse, et cerebrum quaque, quantum hasce functiones spectat, uno eademque tempore in statu diverso esse consuevisse*.

Docrinæ vero, quæ animum rationalem omnia mortalium organa, et voluntaria et non voluntaria, gubernare docet, non pauca a viris ingeniosissimis objiciuntur. Nec hoc illis vitio potest verti cum sententiæ, in quas defensores ejus † concesserint, tam absurdæ sint. Animum tamen principiumve sentiens, sensu quorundam physiologorum hodiernorum circumscripto sumptum, inutile esse minime demonstrarunt. Hallerius et Hunterus potissimum semitam tritam deseruerunt, et hanc novam hypothesein stabilire conati sunt. Posterior, philosophus et physiologus æque ingeniosus, licet notiones principii vitæ et animalium animationis sublimes habeat, de veritate hujusce doctrinæ nihilominus dubitat. Nullum systema nervosum in multis tribuum inferiorum animalibus clare evidenterque detegere valens, id ad animal constituendum non necessarium esse, opinatur. Id tamen illis animalibus,

* Vide First Lines of the Practice of Medicine.

† Stahl, Porterfield and Nichols.

malibus, quæ eo a primo ortu usque fuerunt prædita; omnino necessarium esse, et animum sensumque ibi sedere fatetur; sed iterum idem ullam vim vel potestatem in actiones organorum vitalium et non voluntariorum, in incrementum partium earundemve formationem, et in actiones, quas singulæ partes in semet habent, possidere, vel ad nociva tollenda aliquid conferre posse, inficiatur*.

Quinetiam Hallerus, physiologus illustris, in tractatu suo de corde inimitabilis, et præsertim in parte ejus posteriore, ubi opinionem suam de causis motus cordis memoriæ † tradendam curat, sensa animi similia profert, et motum cordis non ulli potestati, quam animus, vel etiam vis nervosa in id habet, sed principio in fibris muscularibus inhærenti, et a nulla conjunctione cum systemate nervoso pendent, *quod vis insita, vel vis irritabilis* appellat, plane tribuit. Postquam multas res veras, et sequentes potissimum, hujus opinionis sustinendæ causa protulit, actionem nempe cordium animalium, nervis ad ea venientibus intercisissis, aliquamdiu manere, et, in aliquot horas, immo dies, postquam motus omnium aliorum musculorum in æternum consopitus est, per stimulantia rursus excitari posse, hoc modo argumentatur. “Nunc, cum omnes “musculi nervos perinde uti cor suos accipiant, etiam “magis conspicuos, etiam numerosiores, sequitur “muclos cordis supervicturos, si a sola vi nervea motus “musculorum esset. Cum vero reliqui musculi minime supervivant, apparet aliam causam motus in “corde esse‡.”

Auctoritas et opinio tanti tamque docti viri multis, rem ita sese habere, haud dubio persuadebit. Argumento vero rite perpenso accurateque examinato, nos
facile

* Hunter's Manuscript Lectures,

† Element. Phys. Tom. I.

‡ Vide idem opus. Tom. I.

facile probaturos esse confidimus, organa corporis humani diversa, et vitalia et voluntaria, a vi nervosa non tantum actionem universam deducere, sed voluntati quoque ex aliqua parte parere; et opinionem de *vis insita* nulli fundamento inniti, et phænomena inde proficisci existimata per alia principia exponi posse.

In hac disquisitione, quædam, que adhuc locum releganda putavimus, opinionibus Hunterianis obijciuntur.

In omni animali perfecto, quod systema nervosum habet, actio organorum voluntariorum et non voluntariorum per quodlibet stimulus iis applicatum moveri potest; sed potestas, unde hæc actio protinus oritur, vel per nervos ad organa stimolata proficiscentes scotos, vel per opium solutum partibus ipsis corporeive universo admotum, perdi potest, adeo ut in priore exemplo*, nulla actio omnino post breve temporis spatium, et in posteriore, donec potestas opii fuerit ex toto consumpta, et partes vim agendi et sensilitatem solitas, quæ opio sublatae fuerunt, recuperaverint, excitari queat†. Si vero potestas inhærens vel vis insita subesset, hic effectus non oriretur, quod opium ad vim nervosam tantum perdendam sufficiens vim insitam integram et agere valentem relinqueret. Res vero, uti supra fuit comprehensum, sese habet, et si hoc principium reciperemus, cum potestatem, qua vis nervosa moveri queat, clare exponere nequeamus, in multum dubitationis et erroris incideremus, cum eundem effectum duabus causis ex toto diversis tribuere legibus naturæ repugnaret‡.

Vis nervosa igitur sola actionum animalium causa est, et in omnem systematis partem diffunditur, quam

C

quam

* Monro's Lectures.

† Whytt on vital and involuntary motions.

‡ Monro's Nervous System.

quam in aliis locis, quantum ad potestatem attinet, alia est, et mutationes subit, quæ, ut diversorum consensui simus, faciunt. Quo hoc explicem, a vera philosophia minime alienum esse existimo affirmare, ut modificatio, si ita loqui liceat, actionis vasorum omnis organi secernentis singularis est, unde diversi liquores secernuntur, ita conditionem nervorum eorumque potestatis aliis in locis aliam esse, cum omnis propemodum corporis humani pars stimulum diversum, qui actionem ejus moveat, naturaliter requirat, et stimulus uni accommodatus actionem alius non progignat, adeo ut nec dotes horum stimulantium cum sese invicem comparare, nec inde notionem eorum idoneam concipere, possimus. Ita lux oculos, non nares; substantiæ volatiles nares, non oculos, et iterum, sapida linguam, et sonus aures, sed non oculos et nares, afficit. Rursus unum organum hujusce potestatis nervosæ, quam aliud, tenacius est, quod, ut vitam diutius retineat, facit. Ita cor in calidis, et intestina in frigidis animalibus diutius, quam quælibet alia corporum eorum pars, vivunt*, quod ab hac causa, et non a vi irritabili, de qua tot prædicaverit Hallerus, pendet.

Cum in demonstrando systema nervosum unicam sensus motusque causam esse, et organum unumquodque stimulo proprio obedire, hujusque fuerimus progressi, nonne quoque rationale est ponere, illam potestatem, quæ corpus animale quodammodo regit et gubernat, et ad ejus salutem tuendam confert, iis organis esse stimulo, quæ partium incrementum earundemque formationem moderantur, et in nociva corpori applicata possunt, et actionem eorum movere? Quamquam animus hujus evidenter conscius esse dici nequeat; hæc organa nihilominus per principium sentiens afficiuntur, et aliqua ex parte reguntur, cum actiones,

* Halleri Element. Phy. Tom. I.

opes, singulis diebus, perficiamus, quæ, licet voluntati subjiciantur, exercentur tamen, dum carum fumus minime conscii.

Irritabilitatem singularem causam esse opinamur, qua actio horum organorum tam facile excitatur, cujus, cum præter naturam impeditur, vel cum stimulus, quocitur, naturalis præter solitum angetur, conscii evadimus. Ita actionem pulmonum, et etiam cordis, sæpe sentimus; quorum illi voluntati naturaliter parent, et hoc, quanquam eidem regimini non subjiciatur, frequenter tamen per subitas animi motus ita afficitur, ut actiones ejus vel magnopere intenduntur, vel diminuantur. Hinc, ut a causa remota, non raro proficiscitur syncope*. Quo exemplum hujus præbeamus, si ira violentissima, ob quamlibet causam, nobis subito moveatur, dicere sufficiet, actionem cordis per vim nervosam id versus insolita quantitate delatam intendi. Iterum, si terrore tam repentino corripiamur, adeo ut animus omnem aliam rem, præter eam, unde subitus affectus oriatur, neglectui ex toto habeat, vim animi cerebrive a corde averti, cujus motus cessabit, et una cum eo actio omnium totius corporis organorum feribitur. Si quis in nos gladio districto et micante invadat, et mortem nobis minetur, actio cordis, ob vim nervosam id versus copiosius adlatam, angetur, quæ vigorem tonumque systemati majorem conciliabit, et, ut nosinet fortius defendere valcamus, facit.

Hujuscemodi igitur nostra opinio est, rebus veris magnaue auctoritate, non ullo ratiocinio hypothetico, innitens, et principiis philosophiæ congruens. Nihil autem, quo minus ex ea concludamus, obstare videtur, ex omnibus corporis humani organis nulla esse, quæ vere *spontanea* vel *non voluntaria* appellari possunt.

C A P.

* Vide Cullen's First Lines,

C A P. II.

De primis respirationis causis.

PROXIMUM est, ut argumentum strictius persequamur, et primum causas, unde respiratio in fœtu recens excluso oriatur, investigare conabimur.

Nullum quidem argumentum physiologicum est, in quo plus operæ et laboris posuerunt ingeniosi. Tanta vero obscuritate involutum etiamnum manet, ut opinioniones super eo prolatae nec phænomena ejus illustrarint, nec ulla principia certa, quibus in eo investigando insistere possimus, suppeditarint.

Id Whyttius* celeberrimus acumine vero physiologico, quatenus progressus est, fuit persecutus; sed non tam profunde in naturam ejus, ut ei satis luminis offundere valuerit, inquisivit.

Cæterum Hallerus, licet in omnibus suis operibus multum sublimitatis et elegantiae attigerit, principiis falsis hic institit, et rebus veris adversatus est, adeo ut nihil auxilii omnino ab eo in argumento nostro exequendo possit deduci†.

Quinetiam alii auctores, qui non parum claritudinis sibi comparaverunt, non pauca super eo memoriae tradiderunt; sed opinionum eorum mentionem facere multum temporis contereret, et nihil notitiæ nostræ adjiceret. Opiniones quidem auctorum, in quibus multum fiduciæ collocatur, in commodum scientiæ perpendi debent. Igitur, si quolibet earum refellendi onus nobis susciperemus, conamen laudabile foret, licet eas ex toto subruere et convellere non valeremus.

Aer

* On vital and involuntary motions.

† Element. Physiolog. V. III.

Aer atmosphære ad vitam plantarum et animalium sustinendam adeo necessarius est, ut ab eo seclusa protinus pereant. “Vix ullum est animal,” inquit Hallerus, “in quo viæ non sint cognitæ, per quas aer in “intima recipitur..” Igitur, cum primum a matre vel ovo, in quo fuit inclusum, disjungitur, aera avidissime captat, vel respirare incipit.

Proximum est, ut causam hujus actionis pulmonum fœtus insolitæ investigemus. Hanc sensui incommodi tribuit Hallerus. “Soli etiam casui,” inquit, “quædrupedum aviumque vitam committere nolim, ut motui alicui temere ex sensu incommodi facto hiatum oris committerent, vitamque pene universi generis mortalium ex debili quasi fune suspenderem*.”

Quamquam Hallerus quidem recte forsitan primam respirationem sensui incommodi retulerit; in causam tamen veram inquirere cum incipit, principiis falsis insistit, et a semita, quæ eum ad veritatem perducere potuisset, deflestit. Namque postquam fœtum in lucem susceptum protinus spirare incipere memoravit, mox adjicit, “fœtum ideo respirare, quia eundem dudum “sibi familiarem nixum edit, quo in amnio suo alentem “humorem absorpsit.” Postea inquit, “si animal in “utero deglutit, si idem nixus extra uterum editus “aerem invitat, et haurit, crediderim causam inven- “tam esse, quare animal in lucem editum respirat. “Cibum quærit, in quo natabat, aerem invenit, in “quem sese nuncce demersit†.”

Hoc in loco igitur auctor illustris res falsas pro veris adhibuit, et illis hypothesein minime recipiendam inædificavit. Namque res nulla in physiologia melius firmitusque stabilita est, quam fœtum in utero non liquorem amnii in ventriculum recipere. Quæ hoc pro-

bent,

* Haller's Element. Tom. III.

† Idem opus, Tom. III.

bent, numerosissima extant, et, quod plus ponderis, quam quodlibet aliud, forsitan habet, est, fœtus sine ore, immo sine capite, ventriculo et intestinis tenuioribus, in lucem fuisse susceptos*. Quæ vero omnem super hac re dubitationem tollunt, ea potissimum Monroio celeberrimo seniori†, et filio ejus illustrissimo, qui rem Anatomicam Chirurgicamque in Academia Edinburgena in præsentia docet‡, debemus.

Opinionibus autem tam magni viri expulsis, nostrum esse ducimus aliquam aliam proferre, cui tot objici nequeant. Hoc, ea vero modestia et dubitatione, quæ juvenem decent, præstare conabimur.

Cum plerumque notabile sit, mulieres gravidas, navem mensibus elapsis, per quod temporis spatium uterum gerere consueverunt, motus fœtus clarius, quam ante, percipere, et anxietate animi majore, quam nequeant explicare, et doloribus dorsi et abdominis gravioribus laborare, mihi in mentem venit, aliquid mutationis in corpore fœtus, idque in systemate sanguifero, editum esse; æquilibrium nempe sanguinis, ante a matre elaborati, et quantitate majore ad cerebrum, quam ad quamlibet aliam corporis partem, missi, quod ad absolutam illius organi explicationem fuit necessarium, uti postea vi illa, qua a natura instructum est, ad explicationem reliqui systematis plenius perfectiusque conferre valeret, mutatum esse, et plus ejus, pro rata parte, ad artus inferiores devectum. Quo vero incremento horum rite consulatur, sanguis in corpore fœtus ipsius perficiatur, et, pro legibus œconomix animalis, per pulmones, ob rationes postea explicandas, transeat necesse est. Cum autem transitus liber per hoc organum ei adhuc denegetur, cum quantitas solito major in cavas ascendente colligatur, et in dextrum cordis latus infundatur,

* Cooper. Philosf. Transf. V. LXV.

† Edin. Med. Essays, V. II.

‡ Vide Anat. Lectures, MS.

Infundatur, quam ductus arteriosus et foramen ovale facile transmittere nequeunt, cumque latus cordis sinistrum, ab parvas arterias iliacas partem superfluam ad se missam ægre recipientes*, sanguine nimio distendatur, in arteriam pulmoneam immittatur, et aperto facilique itinere, ut modo fuit comprehensum, per eam privatus sensum insolitum in fœtus moveat oportet, quem in utero sentire, sed non percipere posse credimus; quod opinionibus quidem Denmanni et Hunteri adversatur†. Hunc sensum autem pro causa horum motuum, qui circa hoc tempus in fœtu toties notantur, habemus. Facile cum matre communicari potest, et, uti credimus, revera sæpe communicatur, et hæcce conamina quæ eam onere liberandi consilio oriri videntur, excitat. Hæc autem intra tres quatuorve dies non rite procedentia, ut fœtus extingatur, sæpe faciunt; quod eidem causæ in pulmones agenti, inde in systema universum diffusæ, et diutius continuatæ, quam vires fœtus ei obsistere possunt, referendum putamus.

Fœtum vero in lucem jam susceptum, et a matre disjunctum esse ponamus, eadem causa etiamnum, sed multo potentius, agere pergit, sensum molestiæ adeo intendens, ut puer innox suffocaretur, si non aliquid sentiens sibi insitum haberet, quod talia conamina, qualia ad eum anxietate et oppressione liberandum accommodantur, moverit. Namque, si non concederetur, animum esse aliquod intelligens, scientiam ingentiam et innatam, vel multo plus notitiæ, quam quod ab experientia acquirere potuit, possidens, explicatu admodum difficile foret, quomodo puer ex utero recens exclusus actiones spirandi, fugendi, devorandi, tussendi, sternuendi et similium, quorum nullam experientiam adhuc habuit, minime simplices perficere queat,

* Greg. *Conspect. Theoret.*

† *MS Lectures.*

queat*. Si igitur hoc pro vero habeamus, puerum stimulo sensuque insolito affectum eam, qua præditus est, ei occurrendi potestatem exercere, thorax haud dubie musculorum intercostalium et diaphragmatis contractione, et uno cum eo pulmones, dilatabuntur, aer irruens vacuum eorum replebit vasa collapsa expandens, et sanguinem per eos libere transire patietur, unde stimulus sanguinis in arteriam pulmoneam impulsus sensusque molestiæ inde oriens ex toto tollentur, et ea actio, quam inspirationem vocamus, perficietur. Animus vi stimulanæ nunc liberatus agere cessat, et muscoli actiones ejus ante contracti relaxantur, quod finit, ut cartilagine costarum elasticæ cavum thoracis diminuunt, æra expellant, et expirationem edant. Ita omnia respirationis phænomena eo modo, qui supra comprehensus est, peraguntur.

C A P. III.

De causis, quibus respiratio ejusque varietates per totum vitæ decursum continentur.

CUM hoc magni momenti argumentum sit, multi physiologi clari lumen ei offundere fuerunt conati. Alii eorum principia falsa receperunt; alii eo acumine ingenii, quod physiologos decet, excellentes tractatus super eo conscripserunt, quibus pauca tantum objici possunt†. Auctoritate igitur eorum innitentes omnesque lites, quæ nihil aliud quam molem operis augent, opinionem nostram in medium proferre pergemus.

Universi

* Monro's Nervous System.

† Boerhaave, Martine, &c.

‡ Haller, Whytt, Gregory, &c.

Universi animalis motus vel voluntarii vel non voluntarii esse dicantur, ab aliqua systematis potestate, quam principium vivum appellamus, pendentes; namque animalia hoc privata nec sensum, nec motum habent. Motus autem principio vivo adjunctus a sensu pendeat, qui a cerebro, fonte omnis sensus primario, deducitur, et in omnes corporis partes per vehicula sibi propria, nempe nervos, diffunditur. Sin motus a sensu, vel affectu ejus principii cum animo communicato, pendeat, quo organa voluntaria et non voluntaria ad actionem impelluntur, cum respirationis causam esse non concludere non licet. Hoc modo scribit Hallerus*. “Sectæ me inservire nemo objecerit, si “ad voluntatem et animæ imperium hic recurrero. “Tota respiratio et in homine, et in brutis, voluntate “regitur.” In eandem sententiam concessit Galenus†.

Animus sensu molestiæ in pulmonibus affectus ad impetum potestatis nervosæ musculos intercostales et diaphragma versus faciendum excitatur, unde contractiones eorum moventur, thorax amplior efficitur, aer in cavum pulmonum admittitur, et actio inspirationis absolvitur. Deinde stimulo sublato, mens operari cessat, muscoli relaxantur, et exspiratio, thorace coangustato, incidit‡. Hoc in situ non diu manere possumus, sensus ponderis, oppressionis et plenitudinis circa pectus, facie sanguine interea suffusa, brevi percipitur; namque per motus inspirationis et expirationis solos per pulmones ad latus cordis sinistrum libere provehi potest sanguis, ut experimenta § Boerhaaviana demonstrant. His quidem adversantur nonnulla recentia, ab ingenioso Doctore Goodwin instituta||; cum

D

vero

* Element. Physiolog. Tom. III.

† De utilitate Respirationis.

‡ Whytt's Essays.

§ Instit. Med.

|| Dissert. Inaug. Edin. 1786.

vero aliqui illis fidem non habeant, ea silentio præteribimus, donec repetitione magis firmabuntur. Si motus igitur inspirationis et expirationis retardentur, sanguis in pulmonibus accumulatur, et anxietatem et dolorem intoleranda facit, quæ unicam causam esse existimamus, quæ ibi agens principium sentiens ad respirationem movendam excitat. Idem quoque opinatur Hallerus*; namque "anxietatem," inquit, "homo percipit, cui sufflaminatur exspiratio, et aer in pulmone retinetur. Ea anxietate vindicat se exspirando; expirat adeo, eadem modo, uti sternutat, feces deponit, et urinam egerit, ut intolerabili incommodo se liberet." Non citius enim inspiratio aut exspiratio peragitur, quam anxietas depellitur; sed iterum, ob alterutram in breve etiam temporis spatium interpellatam, eadem causa operari incipit, et actio mentis rursus excitatur, ut iis sensibus quam primum occurratur, quos constitutioni corporeæ nocere posse novit. Hoc modo respirationem per totum vitæ spatium conservari et sustineri opinamur; namque stimuli solito valentiores cuilibet corporis parti applicati tales ejus actiones movent, quales ad earum effectibus occurrendum accommodantur†.

Si hoc pro vero et indubio recipiamus, facile concipere possumus, sanguinem, si libere per pulmones transire permittatur, nihil stimuli sensibus percipiendum movere, sensu et actione se invicem puncto temporis brevissimo excipientibus. Si vero transitus ejus per quodlibet obstaculum aliqua ex parte retardetur aut impediatur, aut si ullam ob causam, magna vi a dextro cordis latere per arteriam pulmonicam in pulmones immittatur, accumulatione sua et calore in principium sentiens adeo agit, ut animum sensu ingrato afficiat.

* Element. Physiolog.

† Cullen's First Lines.

ciat*. Hoc irritatus cursum potestatis nervosæ musculos intercostales et diaphragma versus facit tales eorum actiones ciens, quales thoracem latiore et longiorem reddere valent. Hoc vacuum formatur, et aer ejus implendi causa in pulmones irruens inspirationem facit, qua stimulo applicato occurrente transitumque sanguini liberum comparante, animus agere cessat, et, sine ope ejus, per elaterem cartilaginum costarum, reliquis partibus relaxatis, per contractionem musculorum abdominis, et auxilium a potestate fibrarum bronchiorum, quæ in expiratione activæ, sed in inspiratione passivæ † sunt, contractili ‡ derivatum, thorax et pulmones diminuuntur, aer expellitur, et exspiratio peragitur. Respiratio vero per easdem causas et effectus inde oriundos brevi reiteratur. Frequentia ejus vel tarditas a quantitate sanguinis in pulmones immissa, et a transitu ejus per eosdem facili, semper pendebit. Namque pro quantitate, sive exigua, sive magna sit, sensus stimulo applicato respondebit.

In somno, qui pro delirio, non pro quiete animæ §, haberi potest, respiratio continuatur, quamquam non tam frequenter, quam vigilia subsistente, reiteratur. Systema enim, eo tempore, minus sensibile stimulis non tam facile movetur, et actio cordis tardior magisque debilis, ut sanguis pulmonibus minore violentia illidatur, facit. Igitur sensus molestiæ, qui respirationis causa est, non tam subito excitatur.

Cæterum in inflammationibus pneumonicis aliisque pulmonum morbis, ubi major sanguinis, ejusque temperiei calidioris, accumulatio est, quam sanitate sub-

stante,

* Whytt's Essays.

† Vide Monro's MS Lectures.

‡ Gregorij Conspect. Med. Theoret. "Hoc modo aer e pulmone expellitur, juvante simul contractione fibrarum musculosarum, quibus bronchia instruuntur."

§ Porterfield on the Eyes.

stante, spiritus frequentius et cum majore labore trahitur, ab stimulum inde natum. Idem quoque, exercitatione violentiore adhibita, incidit.

C A P. IV.

De varietatibus respirationis.

RESPIRATIONE ipsa satis fuse exposita, proximum est, ut varietates ejus exequamur. Cum vero causis respirationem prognerantibus omnes ab auctoribus comprehensas tribuere nequeamus, omnes reliquas præter *suspirium* et *oscitationem* omittere decrevimus. Illæ quidem a quibusdam præter naturam causis, ut sternutatio ab irritatione membranæ Sneiderianæ, tussis ab irritatione tracheæ se, pendent, et igitur hic idonee commemorari non possunt.

Suspirium autem facit plena et profunda inspiratio, quam excipit plena et profunda expiratio “ tanta vi facta, ut aures adstantium feriat*.”

Variae opiniones de causa ejus fuerunt traditæ; sed tantum absunt, ut votis nostris respondeant, ut diversam proferre necessarium esse ducamus.

Id “ sanguini per pulmones male expedito, ob debiliorem cordis aliarumque virium moventium actionem” Gregorius†; transitui difficili sanguinis per pulmones Hallerus‡ tribuit, “ sive,” ut ait, “ nunc cordis vires deficiant, sive pulmo impediatur, sive et cor valeat et pulmo, verum sanguinis ad pulmonem confluxus solito major sit, neque a viribus consuetis inspirationem cientibus in copia transmitti possit.”

Opiniones

* Gregorii Conspect.

† Vide idem opus.

‡ Element. Physiolog.

Opiniones horum virorum celebrium aliqua ex parte congruunt; quanquam hic longius, et quidem non sine causa, quam ille, in suspirio pluribus causis, quam uni, tribuendo progressus est. Cæterum neuter eorum, ut ex eorum explicatione judicamus, phænomena ejus fatis clara et manifesta reddit. Priore in exemplo, potestatem cordis et actionem suspirando non augemus; nec, in posteriore, quantitatem sanguinis ad pulmones missi ita minuimus, ut reditus ejus præcaveatur; namque hi affectus perpetuo subsunt, et, si causæ solæ forent, suspirium singulis momentis facerent, et, donec iis occurreretur, eo constanter vexaremur. Res vero non ita sese habet; etenim, uno paroxysmo ad finem perducto, ab eo, in spatium temporis non exiguum, vacui manemus.

Ex argumento autem serio attenteque considerato collegimus, mærentes, ebrios, cibo nimio repletos, vel quolibet animi affectu, qualis est amor sc, et aliis, quæ hujus loci non sunt, causis molestiæ, laborantes, qui frequenter suspirare notantur, indirecta*, uti appellatur, debilitate affici; in qua conditione respiratio non æque perfecte, ac sanitate naturali substante, peragitur. Hinc, quamvis totus aer e pulmonibus nunquam expellitur†, quantitas tamen in hoc statu solito major retinetur, et gradatim adeo accumulatur, ut volumen pulmoneum imminuat, circuitum sanguinis per eos impediat, et forsitan aliquid nocivum retinens non parum detrimenti, sensum molestiæ faciendo, systemati minuitur. His partibus autem voluntati subditis, profunda inspiratio fit, deinde alta expiratio eam necessario subsequens aerem expellit. Causa hoc modo sublata, effectus ejus sensusve molestiæ quoque tollitur.

Eædem

* Brunonis Element.—Indirecta debilitas autem cum systematis statum, in quo et vires et sensibilitas, vel excitabilitas et excitatio, imminuuntur, significat.

† Haller's Physiolog.—“ Nunquam totus aer evacuatur, quem recipit.”

Eandem causæ et effectus in exemplo secundo Halleriano, vel ut alia verba adhibeam, in iis hominibus, qui, post acrem exercitationem adhibitam, se suspirare notantur, incidunt. Rebus ita se habentibus, sanguis accumulatur, valentius et frequentius in pulmones impellitur, et actiones respirationis crebriores excitat. Cum hæ vero parum accurate peragantur, eadem causa supra posita oriatum necesse est. Qua substante, cum systema muniis suis non amplius rite fungi queat, idem effectus progeneretur oportet; namque eadem causa * eundem effectum constanter edet.

Proximum est, ut *oscitationem* exponere aggrediamur; cum vero a suspirio non magnopere differat, de ea paucis tantum differemus. Phænomena ejus sunt diuturna, vehemens et profunda inspiratio, os apertum, oculi propemodum clausi, facies magnopere distorta, et non raro distensio omnium membrorum rigida, quæ momento excipiunt expiratio celeris, ingens sonitus osque occlusum.

Signa, quæ eam comitantur, et hoc, quod somniculosos, ad hysteriam proclives, et alios, quibus vires duro labore vigiliaque convulsæ sint, invadit, circuitum sanguinis non tantum in pulmonibus, sed in toto systemate, languidum evasisse, et excitationem quoque imminutam esse, vel aliquantum torporis systema nervosum occupasse, testantur. Hallerus idcirco ait, “remotiores causæ fere omnes ad aliquam debilitatem “pertinent.” Eam vero huic causæ haudquaquam semper tribuere possumus; sæpe etenim in circulo hominum oriri, et unumquemque eorum, vel per vim imitationis, vel in modum contagionis, corripere notatur. Hanc opinionem protulit celeberrimus Gregorius, et eam minime improbabilem esse putamus. Verba ejus hujusmodi sunt, “inter sanissimos etiam
“contagio

* Brunonis Element.

“contagio seu imitatione * mirum in modum propagatur.”

C A P. V.

De effectibus respirationis.

HI autem primarii et secundarii sunt. Illi ad circuitum sanguinis per pulmones promovendum, et ad conjunctionem partium ejus perfectiorem reddendam plane accommodantur. Hanc sententiam, in quam innumeri auctores concesserunt, fundamento stabili inniti nobis persuasum habemus. Auctoritate unius auctoris † in primis docti et venerandi erimus contenti. Verba ejus sequuntur. “Sanguis per innumerabiles vasculorum pulmonum myriades cum premitur atque pertransit, ipse in minimas partes dividitur, conquassatur, et comminuitur, inde flui-
“dior ex pulmonibus redit, quam fuit ingressus.”

Quinetiam effectus primarii ad aliquid nocivum e systemate evacuandum, et ad aliquid salutare, in caloris animalis vitæque subsidium accipiendum potissimum conferunt.

Secundarii in actionibus corporis diversis peragendis, ut in loquendo, canendo, fœcibus excernendis, fœtus expellendo, et in nifus magnos exercendo, quales in magnis ponderibus se levandis adhibentur, juvant.

De calore animalium.

Ex omnibus autem respirationis effectibus *calor animalis* primum locum et maximam attentionem sibi vindicat, non tantum quod animo philosophiæ excolendæ

* Conspect. Med. Theor.

† Hoffmanni Opera, V. I.

tendæ desiderio inflammato mille amœnitates patefacit, sed etiam quod nondum involucro obscuritatis densissimo, quo primis medicinæ seculis implicitus fuit, ex toto liberatus est, licet multi, notitia rei physiologicæ et philosophicæ nobilitati, eum illustrare conati sint. Hippocrates etiam in operibus suis aliquid operæ et laboris in eo explicando posuit. Quæ vero protulit, ea vix attentionem mereri videntur. Cæterum non alienum erit memorare, eum aëra iis, quæ corpus humanum alunt, accensuisse, mais calorem animale a causis præter naturam proficisci putasse, et eum pro aliquo immortali habuisse. Galenus, contra, ignem perpetuum in corde ardere, et aëra, inter respirandum, in pulmones investum fuligines ab eo orientes asportare credidit. Vir celebris Descartes, qui doctrinam ignis vitalis defendit, aëra sanguinem refrigerare et condensare opinatus est. Quotocunque vero honore et reverentia auctoritatem antiquorum prosequi debemus, opiniones eorum, si ut modo comprehensæ, rebus veris non innituntur, et sensu communi solo refelli possunt, hand dubie deferendæ sunt. Si vetusti in tenebris et errore versantur, ad hodiernas transfugendum est, qui collum jugo superstitionis eripere non dubitarunt, et in locum meræ auctoritatis veram investigationem philosophicam suffecerunt. Apud hos vero quoque auctoritatem, qua ratiocinium nostrum regatur, desideramus; alii enim in alias sententias concesserunt. Halesius* et Boerhaavius† enixe contendunt, sanguinem pervasa pulmonum minutissima transiendo calorem sibi comparare, et aërem temperiem ejus moderari et comescere. Hallerus, contra, auctoritate multorum munitus, affirmat, pulmones, cum sanguis in sinistro cordis ventriculo non calidior, quam in dextro, esse reperiatur, ad eum refrigerandum non conferre.

* Statical Essays.

† Prælect. Academ.

conferre. Non citius opinionem suam profert, quam eam nullo modo recipi posse momento nobis persuasum habemus, et summa quidem admiratione afficimur, talia animi sensa a physiologo tam celebritoque claro profluere potuisse. Propter naturam eorum singularem, ea silentio non prætereunda putamus; namque verum pulmonum usum inhalare et exhalare esse, et congeriem eorundem cellulosam ad hocce consilium optime accommodari asserit. Inhalationem ex aqua et aere potissimum constare opinatur. "Aer," inquit, "in pulmone naturam elasticam amittit, adeaque in aqua et vapore facile fit resolubilis, tantaque copia cum in nostris sit humoribus, cumque adeo proximum ex vesiculis aere plenis in venulas resorbentes iter sit, hac etiam potissimum via in sanguinem venire videtur." Insuper addit, "valde probabile est, glutinis loco aerem esse, quod elementa terrea uniat." Quinetiam aliquid materiæ alienæ una cum eo recipi ponit. Verba ejus subsequuntur. "Quin etiam aliæ de aere cum aqua et vapore miscibiles particulæ ad sanguinem veniunt." Et quo opinionem suam absolvat, non improbable esse opinatur, "aerem, cum electricum ignem lente recipiat, eundem quoque lente dimittere." Præcipuam exhalationis partem ex aqua conslari ait. Rem ita sese habere, et ex hoc, quod, cælo frigido, spiritus, quem emittimus, in amplas aquæ guttas condensatur, et ex Halesii docti* et ingeniosi experimentis, quæ cineres calidos, spiritu in eos immissso, septemdecim grana in quinquaginta expirationibus sibi acquirere probant, evidentissime constat. Præterea aerem quoque materia volatili et oleosa, non ex toto a sale libera, imbutum esse sentit. Hosce vapores autem eosdem esse, ac Galenianos, existimat. "Hi nunc oleosi et fætidii vapores," inquit, "sunt illæ

E

* Statical Essays.

“ illæ veterum fuligines, quas in foco illo cordis per-
 “ pectu generari Galenus docuit*.”

Hisc opinionibus attente diligenterque consideratis, nihil omnino in illis offendimus, quod phænomena caloris animalis exponere valet. Si illis sententiis vagis longeque a vero desectentibus regeremur, sub imperium ignorantiae antiquæ rursus redigeremur. Quinetiam nihil auxilii ab opinionibus eorum deducere possumus, qui calorem animale potestibus mechanicis generari credunt. In hanc sententiam concessit Dr. Martine†, qui ait, “ animal heat is produced by the attrition of the blood upon the sides of the vessels.” Hoc vero ex toto subruit et convellit res notissima, solida nempe et fluida in semet invicem agentia calorem prognerare non posse. Antequam ad Priestleium‡, Hunterium§, Crawfordium||, et Leslieum¶, pervenimus, nihil, quod votis respondet, reperimus. Hi magni philosophi, experimentis ducti, multum luminis huic argumento offundere valuerunt. Nulla e theoriis eorum, separatim sumpta, omnia phænomena explicare potest, nec omnes quidem conjunctæ. Absolutissimum tamen eorum conspectum, hucusque editum, haud dubie præbebunt.

Cur animalia, in lucem suscepta, in spatium etiam brevissimum, sine respiratione, vita frui nequeant, duas trefve causas, pondere, uti speramus, minime destitutas, jam tradidimus. Alia commemoranda etiamnum superest, cujus explicatio a notitia mutationum, quas sanguis et aer in pulmonibus subeunt, pendet.

Ex experimentis discimus, aerem atmosphæricum ex aere fixo, phlogisto imbuto et phlogisto orbat, conflare

* Element. Phys. Tom. III.

† Edin. Med. Essays.

‡ Experiments on Air.

§ Philosoph. Transf. Vol. LXVI.

|| Experiments and Observations on Animal Heat.

¶ On Animal Heat.

conflari qui vitam animale[m] sustinet, et flammam ardentium suppeditat, sed tantum pro ratione quantitatis aeris phlogisto privati, quam continet. Namque alterutri horum processuum subditus mole et elatere diminitur, et similibus processibus, in posterum, parum aptus evadit; quod diu philosophos latuerat, sed tandem per experimenta ingeniosa docti Priestleyi* compertum est, cui soli genus humanum magnum lumen debet, quod omni aeris speciei fuit ossusum. Hic magnus philosophus, postquam causam, cur aer atmosphæricus substantiis ardentibus objectus afficeretur, compererat, respirationem quoque eisdem in eum effectus edere detexit. Igitur mutationem in utroque exemplo ab eadem causa oriri conclusit, et per multa experimenta demonstravit phlogiston esse fontem, unde proficiscatur. Utrum hocce principium necne existat, multi auctores dubitant†; dum alii ponunt‡, id omnibus rebus inflammabilibus inesse, et a diversis ejus conditionibus omnia phænomena caloris et lucis pendere.

Cum hoc modo comperisset, respirationem processum verum phlogisticum esse, sibi in animum induxit, sanguinem esse causam, unde recta proficisceretur; quod a multis experimentis didicit, illum humorem magnam phlogisti quantitatem continere, a cujus præsentia vel absentia color ejus penderet. Namque sanguis, aeri puro objectus, phlogisto disjuncto, floridus; impuro, eodem attracto, fuscus nigerve evadit. Ex hisce stabilitis concludit, "that one great use of the blood must be to discharge the phlogiston with which the animal system abounds, imbibing it in the course of the circulation, and imparting it to the air with which it is nearly brought into contact in the lungs;

* On Air, Vol. III.

† Lubbock, Lavoisier, and Scheele.

‡ Black in suis manuscriptis prælectionibus, et Leslie de animali calore.

“lungs; the air thus acting as the great menstruum
“for this purpose*.”

Huc usque hic philosophus ingeniosus in hocce argumentum inquisivit, et deinde investigationes suas aliis ulterius prosequendas reliquit. Lesleius† autem vestigiis ejus insilens tractatum excellentem super animali calore conscripsit, in quo multa nova proposuit. Non tamen usum sanguinis phlogiston imbibere esse ponit, “but that a quantity of phlogiston, being taken
“in with our aliment, undergoes the processes of digestion and chylification without being changed, and
“entering into the blood along with the chyle remains
“there in a fixed state, until by a specific action in
“the containing vessels it is evolved, and that during
“the evolution heat is produced, and this taking place
“in every part of the animal machine, exhibits the
“phenomena of animal heat.” Hoc modo vero explicatum, si non ex animali expelleretur, mortem subitanam ei forsitan inferret. Quapropter pars ejus per vasa perspirationi destinata aufertur, et pars etiamnum multo major e pulmonibus evacuatur, ubi aer in id, in morem inenstrui, ut appellatur, agens partem ejus, singulis in expirationibus, asportat‡.

Proximum autem est, ut theoriam Doctoris Crawfordii consideremus, quæ, per aliquot annos, attentionem doctorum, in omni fere regione in semet convertit. Hic philosophus ingeniosus plurima experimenta, discrimina graduum caloris, qui diversis corporibus inesset, et phlogisti proprietates detegendi consilio, instituit, et ope horum hocce argumentum magnopere illustravit. Calorem et phlogiston duo principia sibi invicem opposita esse, et, quo plus alterius cuilibet corpori fuerit adjunctum, eo plus alterius ab

co

* Experiments on Air.

† On Animal Heat.

‡ Vide idem opus.

eo disjungi solere, vel phlogiston eam vim, qua calor attrahitur, in quolibet corpore imminuere, comperit. Vicem quoque in his verti invenit. Ita, testantibus ejus experimentis, calx mercurii calorem tripla quantitate majorem, quam regulus, continet. Calor vero ab ea disjungitur, cum forma metallica, phlogisto addito, restituitur. Quinetiam calor aeris atmosphærici absolutus acri fixo proprium, ut 67, 1, et calor sanguinis arteriosi exactus venoso proprium, ut $11\frac{1}{2}$, 10, excedere compertus est*. Cum autem experimenta et observationes Doctoris Priestleyi aera in respiratione fixum evadere, et Crawfordii clari aera expiratum minus caloris absoluti, quam inspiratum, continere, et calorem, phlogisto addito, disjungi demonstrant, cumque sanguis arteriosus plus absoluti caloris, quam venosus, comprehendat, huic assentimur, calorem ab aere atmosphærico per phlogiston adjunctum separatum a sanguine absorberi, "and that animal heat seems to depend upon a process similar to elective attraction. "The air is received into the lungs containing a great quantity of absolute heat, the blood is returned from the extremities highly impregnated with phlogiston. "The attraction of the air to the phlogiston is greater than that of the blood. This principle, therefore, will leave the blood to combine with the air. By the addition of the phlogiston the air is obliged to deposit a part of its absolute heat; and as the capacity of the blood is at the same moment increased by the separation of the phlogiston, it will instantly unite with that portion of heat, which had been detached from the air*."

Hinc discimus aerem potentius, quam sanguinem, phlogiston attrahere, sed sanguinem phlogisti, quam caloris, appetentiorē esse. Prout igitur sanguis phlogisto

* Crawford on Animal Heat.

gisto per respirationis processum fuit orbatus, et cum eo rursus in circuitu peragendo conjungitur, calorem, quem ante in pulmonibus acceperat, gradatim explicabit, et eundem* in totum systema diffundet. Portiuncula autem ejus caloris ab hisce particulis, quæ sanguinem phlogisto impertiuntur, absorbetur; quod superest, redundans evadit, vel in calorem moventem et sensibus percipiendum convertitur.

Opinionibus multorum auctorum celeberrimorum jam traditis, ex iisdem quædam cogere et efficere pergemus, quæ phænomena caloris animalis clarius illustratura esse, et eodem tempore sententias, quæ nobis maxime arrideant, conspectui evidentiori subjectura speramus.

Quamquam compertum habemus, omnem systematis animalis partem phlogisto abundare; utrum tamen calor animalis a solidis vel fluidis necessario separetur; statuere non parum difficile est. Si vero experimentis Doctoris Crawfordii confidere possumus, quæ calorem absorberi probant, priorem opinionem potius recipiendam putamus, quoniam pars phlogisti maxima a sanguine, calore ei in pulmonibus adjuncto, separabitur, et igitur, cum defuerit, effectus ei a Lesleio tributos, dum in systema diffunditur, edere non valebit. Namque, si chylus, prout ille auctor judicat, omne phlogiston primario contineat, prius pulmōnes pervadat, quam ad ullas alias partes devehitur, necesse est.

Cum igitur ex omni systematis parte exsorbetur, et calor absolutus deponitur, et pars ejus in calorem moventem et sensilem mutatur, phænomena caloris animalis progènerantur. Phlogiston verò, quod nunc a sanguine

* Dr. Lubbock in dissertatione sua inaugurali, dum aliquid huic doctrinæ opponit, affirmat, calorem inde deponi, unde phlogiston fuerat absorptum, et nihil ejus redundans evadere debere. Cum vero caloris et phlogisti principia non ex toto perspecta habeamus, nonne probabile est, calorem inde, unde phlogiston fuerat sumptum, depositum partem plus quam saturare valere, et partem igitur in calorem moventem sensibusque percipiendum converti?

† Crawford on Animal Heat.

sanguine absorbetur, si non rursus ab eo disjungeretur, mortem subitanam animali inferret. Namque credimus mortem submerforum et suffocatorum huic principio, ob defectum respirationis, retento tribui posse; vel, ut Dr. Goodwyn* opinatur, sanguini venoso, ad ventriculum cordis sinistro devescto, aliquo quod actionem ejus excitare possit carenti. Hoc autem vel calor absolutus esse potest, vel, judice Doctore Goodwyn, aer phlogisto orbatus, quem a sanguine in pulmonibus absorberi, et per circuitum in systema universum diffusum effœctum evadere, et ex eodem organo, et quoque cute sub forma acidi aerii, rursus evacuari existimat.

Quantitatem autem acidi aerii majorem e pulmonibus expelli, quam in eos per respirationem admittitur, experimenta Doctoris Black satis superque demonstrant. Unum horum enarrare liceat.

Adhibe tubum curvum vitreum, ad utrumque finem apertum, qui aliquantum aquæ calcis continet. In alterum finem aera atmosphæricum inspira, et nihil mutationis in aquam calcis editur. Si vero eundem per tubum totum expires, aqua calcis fit turbida, et sedimentum brevi deponit, quod est calx acido aërio superfluo saturata. Unde autem hoc acidum oritur? An ab arteriis separatur, vel per phlogiston cum parte atmosphære eo principio ante privato conjunctum progeneratur? Utraque sententia patronos suos habet. In priorem concesserunt Lavoisier, Goodwyn, et alii; in posteriorem vero viri clari Black, Priestleius et Crawfordius, quorum experimenta adeo accurate fuerunt instituta, ut ad opinionem eorum recipiendam non parum simus proclives. Hæc nosmet dicere patitur, naturam benignam, quæ evidentem in omnibus suis

* Dissert. Inaug. de morbo morteqe submerforum investigandis.

† Vide Prælect. MS.

fuis operibus perfectionem ostendit, varios huic principio nocivo, postquam in partibus systematis diversis fuit evolutum, exitus quasi summa cura diligenterque comparasse. Horum autem præcipuus est pulmones, quorum unicum munus esse videtur hoc nocens principium evacuare, et aliquid salutare in præsidium sanitatis vitæque accipere. Alius est spiracula cutis, ubi similem processum pergere, et eosdem, ac in pulmonibus, effectus edi existimamus. Aer phlogisto imbutus calorem deponit, qui ab inhalantibus absorbetur, si non separatim, saltem cum vapore, ad quem in atmosphæra sustinendum calorem omnino necessarium esse novimus. Quinetiam, cum sterco phlogiston comprehendat, id partem phlogisti quoque, quod cum fœcibus per diversos humores in cavum intestinorum effusus fuit conjunctum, quodque una cum iis evacuat, avehere putamus.

Quamquam res veræ et opiniones, calorem animale exponendi causa jam comprehensæ, causam ejus illustrare valent; omnibus tamen ejus phænomenis non satis luminis offundunt. Namque causæ, quibus animalia naturalem caloris temperiem in omnibus plagis sustinent, investigandæ etiamnum superfunt.

Inter species animalium diversas, gradus caloris naturalis est, singulis proprius, a quo, sanitate substante, sub ea atmosphære conditione, ubi vita facile sustentatur, nunquam defleunt. Cæterum hoc verius affirmatur de animalibus perfectis, ut homine, quadrupedibus, se, quam imperfectis, ut ranis, serpentibus se, quæ, calore atmosphære infra punctum congelationis diminuto, torpida evadunt, et potestates vitæ amplius exercere nequeunt. Homo, contra, calorem ad 60 gradum infra 0 diminutum, vel ad gradum 260 supra punctum congelationis adauctum, impune tolerat. Id certum ratum que efficiunt experimenta ab Academicis

Gallicis

Gallicis instituta, hoc experimenta Doctorum Fordyce et Blagden*, qui, in serie conclavium, calorem eorum ad gradum thermometri Fahrenheiteani intensum, in 20 minuta, sustinuerunt. Primum ingressi sensum molestiæ conquesti sunt, qui sudore copioso prorumpente brevi sublatus est. Hic a superficie corporum sub forma vaporis ascendens frigus fecit, quod omnes humores in vaporem conversi, ut experimenta Culleniana testantur†, præstant‡. Hoc a caloris absorptione, iudice Doctore Black, pendet. Hanc ob causam, non sine ratione gravi, asserere possumus, evaporationem e pulmonibus et superficie corporis, una cum vi atmosphæræ refrigerante, esse rationes præcipuas, quibus calor in systemate animali constanter generatus asportatur, adeo ut nimix ejus accumulationi efficaciter occurratur. Hæc autem alternatim augetur et diminuitur, adeo ut effectus æquabilis edatur, evaporatione, cælo calido, adaucta, frigido, diminuta, dum insuper frigus atmosphæræ interea corpus calore superfluo privat. Quantitas enim caloris, quam corpora calefacta et acri frigido objecta amittunt, tanta major est, quanto calor eorum sensibus percipiendus atmosphæræ circumdatæ proprium excedit§.

Quo vero plus luminis huic argumento offundamus, necessarium hisce supra comprehensis actionem quarundam aliarum potestatum adjicere, et, cum theoriam Doctoris Crawfordii protulerimus, a brevi pauculorum experimentorum ab illo philosopho ingenioso institutorum historia incipere, quæ argumenta ad doctrinam ejus confirmandam accommodatissima suppeditant.

F

Canes

* Philosoph. Transact. Vol. LXV.

† Phys. and Liter. Essays, Vol. II.

‡ Vide Academical MS Lectures.

§ Crawford on Animal Heat.

Canes* et feles et in aqua et aere supra et infra temperiem naturalem et calefactis et refrigeratis collacavit, et sanguinem e vena jugulari ita positorum emisit, qui temperiei calidæ subiectus floridus fuit, et frigidæ fucus et subniger, quique alternatim colorem mutavit, prout animalia a calida ad frigidam temperiem et vice versa removit; unde sequentia cogere licet: Pro ratione, qua calor atmosphæræ immittitur, potestatem in animalibus vel necessitatem phlogiston evolvendi diminui, et vice versa; et, ut observationes supra positæ manifeste docent, tantum caloris, quantum phlogisti in pulmonibus evolvetur et separabitur, ab aere depositum iri, et, in præsidium vitæ animalis, a sanguine, in decursu circuitus, absorptum iri. Igitur cum necessitas phlogiston evolvendi, tempestate calida, diminuatur, ita potestas calorem animale generandi, pro rata parte, minor evadet. Hæc res idcirco, utpote quæ stabilitatem caloris animalis tueatur et conservat, quantum œconomiam animale spectat, summi momenti est.

Ultimam autem potestatem, qua calor animalis sustineatur, actionem principii vivi esse censemus. Hoc non ab ulla structura vel ordinatione materiæ mechanica pendet, ut Doctori Aitken† placuit, sed materiæ ipsi adjicitur. Quanquam materiæ ovi, in simplice statu, inest, a motu vel actione minime pendens; ultima tamen omnium motuum in animalibus et actionum, et igitur caloris ipsius, causa est. Namque processus, quo hic progerneretur, ab actione systematis arteriosi singulari pendet, quæ pro vigore principii vivi intenditur, adeo ut plus caloris in una parte, quam alia, progignat. Hinc cor et intestina animalium, quam reliquæ partes, calidiora sunt. Hinc quoque

* Philosoph. Transf. Vol. LXXI. Part 21.

† Prin. of Anat. and Phys.

que pueri plus caloris, quam ætate provectiores, habent, et frigori diutius obfistere possunt. Etenim, ob systemata eorum magis æstuosa, principium vivum copiosius progeneratur; a quo hocce phænomenon admodum notabile pendet. Hoc neminem fugit, pueros gradum frigoris ordinarium facilius, quam adultos, tolerare. Exemplum probe novi, ubi mater vi frigoris intensa extincta est, puerum in sinu gerens, qui nihil detrimenti inde accepit. Hoc haud dubie actioni hujusce principii adauctæ, quæ, necessitate postulante, semper incidit, referendum est. Hæc opinio autem minime solitaria et propria est, namque a Gregorio claro memoratur. "Scilicet," inquit, "quo majore caloris subsidio egemus, eo plus caloris nobismet comparamus, quo minore opus est, eo minus gignimus*." Iterum Cullenus immortalis † non probabile esse opinatur, principium vivum ad hunc effectum edendum nihil conferre. "May it not," ille inquit, "be supposed, that there is some circumstance in the vital principle of animals, which is common to those of the same class, and like œconomy, and which determines the effect of motion upon the vital principle to be the same, though the motion acting upon it may be in different circumstances.

Quo hoc principium existere ulterius probemus, et observationes super eo factas firmemus, pauca experimenta a jure celeberrimo Joanne Hunterio instituta ‡ raptim percurramus. Animalia, quamnam calorem prognerandi potestatem haberent comperiendi consilio, gradibus frigoris intensis objecit, quibus in spatium temporis non breve resistenterunt. Cristæ gallo-

rum

* *Conspect. Theoret. Med.*

† *Institutes of Medicine.*

‡ *Philosoph. Transact. Vol. LXVI. and Observations on the Animal Œconomy.*

rum aureſque cuniculorum in miſturas congelantes fuerunt conjeſtæ, ubi vitam in aliquantum temporis ſuſtinuerunt, donec poteſtas calorem progignendi per-dita eſt, et mors incidit. Quinetiam duo ova, quorum unum recens, et alterum urinum fuit, gradu caloris ad 0 ſubjeſta fuerunt. Hoc, quamprimum ad punctum congelationis acceſſit, gelationem ſubiit; ſed illud calorem ſuum ad gradum viceſimum nonum dimidiumque uſque diminui paſſum eſt, cui frigoris gradu magno in 15 minuta obſtitit, et tandem, actione principii vivi per vim frigoris debilitantem exhausta, ad punctum congelationis, gradum nempe trigefimum ſecundum, aſcendit. Argumentum actionis hujus principii hoc validius vix poteſt deſiderari. Inde, ſine ulla dubitatione, concludere poſſumus, hoc principium in calore animalium progenerando et conſervando, et in regimine omnium animalium functionum, multum valere.

Eſſeſtibus reſpirationis primariis nunc ſatis ſuſe expoſitis, ſecundarios leviter attingamus oportet, quos in diverſis corporis animalis actionibus edi diximus. Attentionem vero noſtram ſyſtemate humano circumſcribemus. Quod reſpiratio voluntati paret, ſermocinari cum ſodalibus poſſumus, et puella, ætate et pulchritudine florens, auditores ſuavitate canticorum et elegantiâ in admirationem rapit. Cæterum vis hujusce rei in hoc evidentius apparet, quod mortales in veſicam uriniferam et inteſtina evacuando, quod matrem doloribus partus colluſtantem in fœtu expellendo, quod operarium, ſemet et familiam manuum mercede tolerantem, in agro colendo juvat. Namque ſi ſpiritus ſupprimatur, et thorax aere præter naturam diſtendatur, ſanguis tranſitum per pulmones parum perfectum offendit, et igitur in cava deſcendente accumulatur, adeo ut redditui ejus a cerebro obſiſtatur,

fistatur, et distensio ibi oriatur. Rebus autem ita sese habentibus, cerebrum quantitatem sanguinis præter consuetudinem magnam accipit, viresque insolitas sibi acquirit, adeo ut potestas nervosa quantitate inusitata omnes corporis musculos versus dirigatur, firmitatem et vires, quibus non facile potest obsisti, illis concilians, quales in omni nisu magno requiruntur. Signa, quæ in exemplo hujusmodi incidunt, qualia sunt rubor faciei, sensus plenitudinis in capite, dolores super oculos, me ad hanc sententiam primum deduxerunt. Et si ratiocinium analogicum recipi posset, casus mania laborantium eam eleganter illustraret. Namque hic, ob aliquam causam, affectus animi violentiores, potationem liquorum spirituosorum nimiam, corpus radiis solis australis diutius objectum sese, cursus sanguinis solito major ad cerebrum fieri videtur, morbidam irritationem ibi movens, quæ, ut vis ejus nervosa organa motui voluntario inservientia versus copiosius potentiusque, quam aliis temporibus, dirigatur, et majores illis vires comparet, facit. Hæc irritatio vero adeo abnormis et irregularis est, ut operationes mentales confundat et perturbet, ad quas rite perficiendas status cerebri sanus necessarius est. Hinc fit, ut miserandus ægrotus, aliquid magnum conaturus, semet non raro decipi et frustrari reperiatur; sed adstantes tamen in admirationem summam vigoris et virium corporis ægre exæquandarum frequentissime rapiat.

Quamquam omnia, argumenti illustrationem spectantia, jam ad finem perducta sunt; me tamen a scribenda non prius desistere oportere puto, quam a lectore ingenioso enixe rogavi, ut non de ulla opinione hic relata, donec eam attentus consideraverit, et omnia argumenta ei faventia candidus perpenderit, temerarius statueret. Si hoc facere dignabitur, tela critica,

quæ

quæ a mortalibus iniquis in omnem auctorem, præsertim primum epusculum primitiasve studiorum in vulgus edentem, et aliquid honoris in re literaria sibi adipisci discupientem, conjici solent, minus timebo.

Ab sit quoque, ut hanc occasionem, quæ in præsentia sese offerat, Præsidi, Vicario Præsidi et Professoribus hujusce Academiæ Medicis, ob studia summa eorum attentione provecta, et ab fructus magnos a prælectionibus eorum eruditis perceptos, grates meritis persolvendi ingratus omittam. Diu, ab omni parte beati, vivant et floreat, et omnia bona, mortalibus exoptanda, illis abunde contingant.

Quinetiam amico meo docto et ingenioso Joanni Bell, super Obstetricio apud Edinenses prælectori, ob officia plurima et publica et privata, quibus me constanter profecutus est, gratiæ sinceræ sunt referendæ. Omnia cæpta ille rite procedant, et eo tandem, quo merita rara eum deducere debeant, perveniat, honore multo fructu laborum justo onustus.

Denique amico non minus digno, Samueli Caldwell, Armigero, S. A. P. S. Philadelphiensis, propter singularem amicitiam et urbanitatem in me Philadelphicæ degentem demonstratam, gratiæ ex animo beneficiorum non immemore sunt habendæ. Diu, in solatium familiæ excellentissimæ, felix, et ob publicas privatasque virtutes, uti optime meretur, honoratus, vivat, commodissima valitudine beatus.

FINIS.

